



15 September 2012

Mat Despatch bersalah edar dadah ke tali gantung

SHAH ALAM: Seorang penghantar cepat dihukum gantung sampai mati oleh Mahkamah Tinggi di sini, selepas didapati bersalah mengedar lebih hampir dua kilogram (kg) ganja di Kota Damansara dekat sini, dua tahun lalu.

Hakim Datuk Akhtar Tahir membuat keputusan itu terhadap Syamsul Akmal Shah Baki, 29, selepas berpuas hati pihak pembelaan gagal menimbulkan keraguan munasabah terhadap kes pendakwaan. Akhtar pada penghakimannya berkata, pihaknya mendapati keterangan tertuduh ketika membela diri bahawa dia diperangkap oleh seorang dikenali Zuhardi adalah tidak boleh dipercayai.

Beliau berkata, tidak ada sebab untuk individu itu berbuat demikian memandangkan kedua-dua lelaki itu tidak mempunyai sebarang permusuhan. Selain itu, katanya, mahkamah menolak dakwaan tertuduh bahawa polis meletakkan pasportnya ke dalam beg ditemui mengandungi dadah itu. Sepanjang perbicaraan, seramai tujuh saksi pendakwaan dan dua saksi pembelaan tampil memberi keterangan.

Mengikut pertuduhan, Syamsul didakwa mengedar 1.763 kg ganja di tingkat tiga berhampiran lif, Blok C, Carlina Apartmen, Jalan Sepah Puteh 5/1, Kota Damansara, kira-kira jam 10.30 malam, 18 Julai 2010. Dia didakwa mengikut Seksyen 39B(1)(a) Akta Dadah Berbahaya 1952 dan boleh dihukum di bawah Seksyen 39B(2) akta sama yang memperuntukkan hukuman mati mandatori jika sabit kesalahan.

Pada prosiding semalam, pendakwaan dikendalikan oleh Timbalan Pendakwa Raya, Norhani Mohd Adzhar, manakala tertuduh diwakili peguam Mohd Afifuddin Hafifi.

Berdasarkan keterangan saksi sepanjang perbicaraan, sepasukan polis mendapat maklumat berhubung satu sindiket pengedaran dadah di tempat kejadian.

Pemerhatian mendapati tertuduh keluar dari kereta dan membawa satu beg galas. Menyedari kehadiran polis, tertuduh cuba melarikan diri.

Bagaimanapun, lelaki itu berjaya ditahan selepas bergelut dengan polis.

Artikel ini disiarkan pada : 2012/09/15